

國朝閨閣詩鈔

國朝閨閣詩鈔

第四冊

問花樓詩集

德化

許權

宜娛

在璞堂吟稿

錢塘

方芳佩

芷齋

浣青詩草

武進

錢孟鈿

冠之

臥雪軒吟草

仁和

杭澄

筠圃

繡餘草

廣豐

李葆素

素瓊

職思居詩鈔

青浦

張佛繡

抱珠

聊一軒詩稿

震澤

沈蕙玉

晚亭

綠秋書屋詩集

江夏

張因

淑華

聽月樓遺草

休寧

汪韞玉

蘭雪

紅雪軒詩稿

漢軍

高景芳

遠芬

第四冊

卷一

許宜人權字宜娛江西德化縣人諸生震皇女  
饒州教授湖口崔謨室州同慶椿之母工刺繡  
尤善白描法著有閨中小草問花樓詩集

問花樓詩集

德化許 權宜娛

田婦行

椎髻饁田畝其夫耕且顧宇宙有至情聊以娛  
且暮世有利名人棄之如陌路所以同倡隨甘  
心荆與布相繼荷耒歸村鐙照晚酺

贈外

君子安厥命真人息其機舉世笑君貧君貧不

自知天地兩大境溫飽與寒饑人不寒饑死定  
有溫飽時陰陽相倚伏此理天不虧痛飲劉伶  
酒狂吟李白詩終日無塵事春風任所之

七夕詞

七月七之夕家家望女牛神仙不可見涼風何  
颼颼我疑天孫之巧轉近拙東西隔斷難飛越  
一年一度一分離千古銀河響幽咽不須乞巧  
向天孫若賜巧來愁欲絕君不見東家力田婦

耕鑿常相隨旦暮共苦樂白首不分離又不見  
西鄰有才女夫婿上玉堂終年不相見悵望悲  
河梁玉露無聲夜清悄盤中盼斷蛛絲遶不知  
巧思落誰家只恐巧多人易老寄語人間癡女  
兒寧爲其拙毋爲巧

夢天

招我以神仙之窟島嶼之墟乘我以丹鳳之輦  
赤龍之車下踏五嶽俯清虛上摩日月走天衢

回首人世真渺茫平地一抹何蒼蒼雲山幾點  
海中央我欲棄之任翱翔忽聞空中飄鼓吹綽  
約佳人御雲氣似曾相識碧落邊共赴瑤池爲  
仙吏瑤池日敞宴初開星娥月姊歷歷來我時  
不見虎尾豹齒之神人但欲細嚼流霞酒一杯  
旋覺心清骨髓酥汗透衾冷夢覺初孤燈孤枕  
無聊甚西風淅淅來庭梧

雨晴



山路忽如洗幽禽語不休殘風收雨腳晚照破  
雲頭柳眼猶含淚花心尙帶愁凭闌多感慨春  
色滿晴洲

聽雨

細雨乍淒其寒閨聽卻宜隔牕心共冷欹枕淚  
同垂殘夢剛醒後孤燈欲滅時誰能拋此夜留  
著領相思

夜坐遣懷

爲有羅衣掩卻名感懷心緒怕深更柔風密竹  
敲難靜細雨孤燈濕不明撥酒案頭書恨字援  
琴几上結愁聲蕭然獨坐寒閨悄羨殺隣姬解  
薄情

### 曉妝

烟籠曉日集牕紗紅粉樓中理鬢鴉呵鏡淡雲  
成豔膜倚妝倩影動情芽纖腰欲笑臨風柳香  
頰全欺裊露花縱使春光生妒我一鈎簾幙若

爲遮

早雁

懨懨病骨怕逢秋  
鎮日無言獨倚樓  
何事塞鴻來恁早  
西風料峭一聲愁

第四冊

卷二

方夫人芳佩字芷齋一字懷蓼號鳳池浙江錢塘縣人處士德發女湖北巡撫汪勤僖公新室工古文著有在璞草堂詩稿二卷

在璞草堂詩稿

錢塘方芳佩芷齋

雨中看山

連朝掩扉臥襟懷殊怏怏重陰晝亦昏遠色潤  
書幌忽聞山雨飛檐溜送清響開簾得奇觀林  
木何蒼莽豈徒眼界清足使神情爽擁鼻一微  
吟揮毫技復癢橫斜字半欹聊以記幽賞絕愛  
羣鴉雛衝煙自來往

西湖打魚歌和吳好山先生韻

明湖浩渺萬頃秋  
荻花紅蓼榮汀洲  
朝霞散彩旭日上  
鳴榔掉出千餘舟  
招呼齊起布巨網  
迴旋水面風颼颼  
錦鱗潑刺駭欲遁  
亂拋玉尺驚眠鷗  
漁人生小江湖慣  
拍天翠浪相沈浮  
長笛一聲起煙際  
笑歌歸去笠簪收  
雲峯不動臥寒碧  
浴鳧飛鷺還悠悠

乘月過萬松嶺

晚覺藍輿速青山不厭重歸雲封古洞片月佇  
遙峯怪石全疑虎蒼松半似龍行行城闕近猶  
送隔林鐘

初夏

日永無塵事山居境轉幽雨歸雲外樹人語竹  
間樓春去寒仍淺花殘蝶解愁晚窗茶未熟一  
縷翠煙浮

苦雨

厭聽鳩聲不住啼連朝風雨更淒迷窗深常似  
晚來暗簷際忽驚天欲低影散綠筠千箇溼春  
愁新草一階齊須知此日西湖上水滿平添十  
里隄

南樓寫望

入望煙村傍大江疎林遮處色蒼蒼樓高天漢  
三層碧山映晴暉一角黃湖水雲連添遠影桂  
花風過剩餘香憑欄極目思千里準待南來雁



字長

題翁朗夫先生三十三山草堂圖

片颿歸去濯滄浪更向深山築草堂  
揮塵但招雲入座藏書應擬石爲倉  
微茫樹色侵細帙歷亂巖花護筆牀  
閉戶不聞塵外事靜攜經史校鉛黃

答懷藻姊詢近況二首

河橋分手惜恩恩數載悲歡事不同  
至戚已從

生死隔故交惟有夢魂通  
嗽名漫學屠龍技處世  
今如失馬翁問訛蘭閨無恙否  
莫教惆悵對飛鴻

含毫每欲寫相思一紙離愁不自持  
連日江山頻入夢經旬燈火罷譚詩  
浮雲世態無今古流水韶光感歲時  
一語寄君應絕倒此生竟爲讀書癡

不寐

娟娟素月一鉤橫山漏遲遲早報更入夜層巒  
疑畫本隔林老木作秋聲人間易動存亡感境  
冷難禁俯仰情獨掩柴關清不寐蘭膏消盡短  
燈檠

西湖雪

湖水莽無痕雲峯失故態猗與苧蘿女遽爾施  
粉黛

紙鳶

翦紙爲形骨相寒常依稚子博悲歡偶然得藉  
微風力卻要旁人仰面看

新竹

綠籜含煙夜月寒臨風披拂玉琅玕怪來翠袖  
涼如水日暮無人獨倚闌

夜坐

憑欄遙望玉繩低風撼林梢烏夜啼一縷斷雲  
吹不散又和明月過樓西

堇浦先生以雨中看山拙作附刻嶺南集

賦此誌媿

結習難忘韻語耽蟲吟蚓唱庶同叅璩璫自笑  
羊公鶴姓氏空傳到嶺南

憶西湖

清涼世界水晶宮亞字紅闌面面風今夜若還  
身化蝶祇應飛入藕花中

七夕遇雨

驅除殘暑暮涼生  
陡覺空庭夜色明  
我本無心貪乞巧  
正堪臥聽雨聲聲

秋夜

繡枕垂雲夢乍醒  
侍兒愁睡觸銀屏  
拏帷欲問更深淺  
露溼紅蕉月半庭

第四冊

卷三

錢恭人孟鈿字冠之一字浣青江蘇武進縣人  
刑部尚書文敏公維城女荆宜施道永濟崔龍  
見室性至孝嘗剪臂療父疾嫻史記擅吟詠著  
有鳴秋合籟浣青詩草

浣青詩草

武進錢孟鈿冠之

始皇塚

驪山高復高落日羃荒臺西風吹白道下見幽  
宮開秦政昔亂紀刑殺如霆雷鯨吞六國盡聲  
色非仙才童女不復還龍戰飈輪摧寄言鎬池  
君英武安在哉千人競謳唱運石清渭隈築之  
崇三墳下鈿泉水來黃金作天地日月爲樽罍



銀海停不流人膏燂無灰飛蠶三十箔一一紅  
玫瑰知埋幾皓齒何論萬匠哀可憐閉衰草虎  
視斂寸坏雖令地成市難買青陽回坐使天下  
傾何待長城摧楚炬與收火兩赭無遺煨寶玉  
不在土死增骸骨災徒聞古丈夫霞舉登蓬萊

漢通天臺銅人歌

武皇歲起雲陽宮高臺屹與雲漢通欲求真訣  
鍊顏色紫瓊之露飛濛濛青霄不下兩皇子十

二仙人一夜死文成五利不及一少翁能使香  
魂望如水淒淒茂陵月玉盃埋苔碧難聞舍人  
壺空羨方朔戟當途代漢逾百年銅人之淚流  
作鉛移經灞水亦傷別迴頭立盡東關烟君不  
見古今興廢皆陳跡金石有情悲過客化爲銅  
駝卧荆棘

憶遠詞

瓊樓十二鎖暗香珍珠簾箔空象牀銀瓶凍合

漏聲碎被池閒殺錦鴛鴦白日苦短夜苦長美人胡爲隔瀟湘峩高山不可越雪浪舞空舟一葉極日天涯愁殺人綠窗明月爲誰新秦箏趙瑟久不御呆恩曉寒生網塵城頭伊伊角聲起烏鴉滿天秋色裏思君夜夜復朝朝日月有盡情難已

題素溪姊玉輪香滿圖卷子

青銅鏡白玉盤問誰手挂青雲端胚胎鴻濛開

皓色萬古清光磨不得我夢上天天無梁但聞  
銀漢聲琅琅琉璃爲地玉作房素杵不動珠成  
霜中有一人粲玉齒下視塵世悲餘子笑逢纖  
女褰麻姑乘雲曳佩仙不孤冰輪一駐幾何時  
只問年年紅桂枝花開花落無人知

賦雪用東坡聚星堂韻

江頭一夜驚風葉曉拓玻璃見春雪天公有意  
阻羣芳只許梅花占幽絕積厚階前落絮重斜

飛簷際修篁折官厨綠酒聊禦寒燕寢清香頗  
未減自憐謝女心情老禁字詩難肘頻掣滿堂  
賓客日逮閨隔簾樺燭花生纈吟成一百四十  
字迴與長空鬪飛屑忽憶春郊幾處烟麥苗凍  
壓饑鳥瞥須知茅屋窮人苦急與黃堂夫壻說  
勸農五馬待春晴一尺犁泥萬鉏鐵

送別

日黯江城暮風高海氣秋相思一帆影離別萬

重愁報國君須去承顏我自留霜楓搖落後莫  
上望鄉樓

九日寄曼亭

夫君薄宦阻秋期寥落三年寄所思露氣漸凋  
林下葉霜風暗度鬢間絲歸從白浦鴻相侶瘦  
盡黃花蝶未知屈指半生佳節過向來尊酒幾  
同持

立秋

一葉涼風起吹來天末情寒衣須早寄蟋蟀已  
秋聲

客夜

虛庭鳴蟋蟀空外結秋心獨客已遙夜高城有  
暮砧

舟次寄懷

絲雨斜風客棹還吳山越水總淒然重來不異  
遶東鶴花竹都成隔世緣

再寄曼亭

春來漢水兼天遠月到巫山特地寒  
若向琵琶亭下泊青山只作故人看

哭弟婦二首

忍聽啾啾乳燕聲蕭條門巷曲池平  
九原兄弟如相見應說孤兒漸長成

摧殘棣萼已傷神又送孤花一朵春  
今日淒涼惟剩我舉頭誰是至親人



第四冊

卷四

杭女史澄字清之一字筠圃號定水老人浙江  
仁和縣人編修世駿妹國學生趙萬暲室以清  
節稱著有筠圃吟草湛堂書幃詩臥雪軒吟草  
伏枕吟

臥雪軒吟草

仁和杭 澄筠圃

詠蘭

猗歟芳蘭此焉游處香本王者其何可語當門  
恐鋤入室誰與或采其芳將以佩汝

壽母詞

仁壽古聖語今益信其然吾母有盛德高行媿  
昔賢紛華屏勿御嗜好簡編丁年挽鹿車偕

隱厲貞堅克相先君子養志怡林泉旣復念同  
氣安忍各一天猗歟連理枝同歸斯慰焉效彼  
皇與英共調琴瑟絃恪奉堂上姑甘旨罔所愆  
內外諸姻戚恩禮相周旋貴賤殊一致至性無  
黨偏吾父先捐棄中心恒悁悁教子慈且仁殷  
勤師三遷闡範自可法德音難具宣今歲屆古  
稀鬢錄勝少年兒孫繞膝下萊綵何翩翩仲兄  
蘊經術對揚聖主前恩綸來帝闕丹詔五色鮮

于以答慈惠褒德福始全癡女媿無似陳詞徒  
幾幾寸草雖有心安報春暉妍雙萱並秀挺亭  
亭北堂前長跪獻壽酒願祝如增川

乙卯孟夏堇浦二兄應詔北上值四十初  
度聊作長句送行且祝壽也

東坡先生生丙子吾兄亦生丙子年其閒相去  
數百載高才掩映無後先吾兄襟懷殊侔儻有  
金買書不買田門攤市集恣收拾聚集萬卷刊

訛偏遂藉學以充其才淹貫該洽無比肩作詩  
自是邁李杜論史直欲薄固遷傲睨當世罕其  
匹羣儒辟易皆俛然乃知才大世所忌數番上  
策不得意丈夫會合自有時旣具異才遇當異  
比年天子下璽書爬羅剔抉求真儒名字赫赫  
掩不得聲華遽以達帝都盛哉此舉誠曠典本  
朝兩次收琬衍大科拔擢五十人固陵長水稱  
無忝厯代名更實則是遠溯其原自漢始下逮

晉唐及宋季煒然著作垂青史擁書萬卷如百  
城大廷對策筆縱橫遭逢聖明展懷抱如兄斷  
不負平生今年四十當強仕覽揆辰值長途裏  
鬱蔥佳氣滿溪山尊酒風光差足喜報答春暉  
日正長欣欣顏色動高堂飄零弱妹才無似北  
望遙飛介壽觴

獨坐

坐久不覺暝羅衣怯晚風遠星隨月後孤嶼入

雲中歸鳥爭棲樹浮煙欲蔽空天涯一長望懷  
思正無窮

舟泊淮陰晚霽

淮陰城下郡門西草徑荒涼客路迷村落幾家  
茅蓋屋野田一帶水平隄櫓聲住處歌初起樹  
色濃時鳥亂棲爭似故鄉風景好兩峯三竺與  
雲齊

夏日移榻讀書草堂

泠泠竹韻響南窗六月清寒枕簟涼不識人間  
有煩暑悠然高臥近羲皇

追感

牛衣未暖別離催貧賤夫妻樂亦哀遺札可憐  
猶在篋夜臺那復一緘來



第四冊

卷五

李女史葆素字素瓊號晚香居士江西廣豐縣人鉛山貢生蔣謙室通經史詞賦著有繡餘草三卷詩餘一卷

繡餘草

廣豐李葆素素瓊

理髮

憶昔少小時髮長盈四尺手短不能梳獨坐暗  
自感阿姊笑我癡仍復爲我惜代我挽盤龍挽  
就黛欲滴二十奉事君愛我髮綢直女紅晝夜  
忙十日不得息自謂如亂絲不道若新飾自君  
行萬里使妾增憂惕妾本愁病人忍見君行役

安危未可知相思病轉劇半載未整理綬結等  
梭織玉篴略一施散落紛堆積淚眼自相看徘徊  
不忍擲待君歸來時收拾置君側

山居

我昔來此居時方二十六今已廿餘年五十行  
在目旣變處深山且喜移薄俗薄俗未即敦頗  
自知檢束願得成古風我意亦已足

花月吟

君道妾如花妾道君如月如花君意憐如月妾  
心悅但願如花開不歇但願如月圓不缺願君  
長作花邊身願妾長作月中人月在花邊常炯  
炯花在月中時弄影月意花不疑花心月自知

### 猛虎行

山中有猛虎傷物更傷人傷物猶可傷人驚我  
我在山中居虎在山中藏我德不足令虎感我  
力安能爲虎防願得勇士操利器殺盡猛虎方

遂意食虎肉寢虎皮猛虎至此何能爲天道好  
還寧不知

勉外

文工命塞知音難得命塞堪悲文工可惜三獻  
楚廷再別誰惻抱玉徒歸我爲君感君笑謂我  
愚窮達亦何殊男子自奇耳寧必在區區古來  
有志士軒冕等泥塗吾將與世訣還我好頭顱  
吾年將半百安得復馳驅養素深山中與子同

歡娛我謂君心莫遽冷人間萬事何憑準君母  
遺言不可忘我母生前屬望長英雄得志會有  
日莫漫心摧古戰場

絕筆

爲女不能事父終身爲婦不能奉姑畢世爲妻  
不能伴夫到頭爲母不能令兒長倚平生憾事  
有如此我竟至此誰實使我欲排雲訴上帝婦  
女區區何足忌

梅花

我愛梅花好梅花似我多清標能絕俗傲骨豈  
猶人未肯趨時豔寧甘遜世塵晚香盟自結即  
此見吾真

棕樹

樹木十年計無如機樹良能資人世用何愛髮  
膚傷鐵柱亭亭立風輪葉葉張每當炎暑日青  
蓋有餘涼

中秋坐月有懷

我愛今宵月秋光萬里清可知能愜意獨自不  
勝情對此成孤坐翻思逐遠行閉門呼子女恐  
照淚痕明

對鏡

花顏無復舊時紅每日臨粧怨曉風弱質半生  
常善病愁腸百結邁多凶雲鬟但覺春霜滿星  
眼徒教秋水同粧罷還將明鏡攬倚闌無語獨



書空

謝鄰女

沉綿一月意悽悽  
女伴邀過小院西  
縱使高情傾玉盞  
那堪小步印香泥  
半簾花雨時將過  
一枕春風人自迷  
爲語同來雙姊妹  
碧桃花下好相攜

怨情

生來本細腰裙帶常拖地  
一自別河梁羅裳三

度繁

寄外

離家萬里隔關河  
旅館寒燈寂寞多  
見說封侯原有命  
歸期何事尙蹉跎

小園夏日

綠柳千條映碧紗  
紅榴一樹爛明霞  
小園寸地毋教棄  
隙處還栽金鳳花

姑蘇柳枝詞

誰家年少逞春嬌  
戲挽長條與短條  
馬上兒郎  
太輕薄  
揮鞭故故傍  
臬橋

第四冊

卷六

張女史佛繡字抱珠江蘇青浦縣人行人梁女  
金山諸生姚惟邁室善絲桐通內典著有職思  
居詩鈔二卷

職思居詩鈔

青浦張佛繡抱珠

秋日雜詩

秋氣入我樓西風報初寒  
郊原過微雨景物肅以閒  
澄泓泛遙波蒼翠浮重巒  
草荒露華白林媚楓葉丹  
海燕去不息落木紛江干  
榮瘁有代謝節往獨無還  
自非達觀人誰能弭憂端

夏日池上

小亭涼氣多一榻掃煩燠四面環清流閒坐豁  
心目曲徑轉危橋古藤蟠老木山光當晝寒竹  
色上衣緣時有薰風來荷氣自芬馥幽鳥啼深  
林疎花落棊局終日遠塵氛蕭然似空谷

擬謝元暉郡內高齋閒望荅呂法曹

郡齋亦清曠俯仰窮幽深澄川映疎牖孤峯秀  
前林風清獨鶴唳日隱飢鼃吟不醉樽中酒空  
對窗閒琴思君安可極朝夕勞中心幸藉精神

通惠我良書音何時慰延頸嘯傲凌高岑

寄懷愛庭四兄

端居寡物役遙夜屏紛慮罷琴坐西軒朗月出  
高樹念我同生親迢迢隔雲路誰禁慕遠懷偏  
與清景遇關山無窮極滄波安可渡喜接良書  
音春風三月暮離思落花前紛紛已無數瞥眼  
又殘秋芳草委繁露寒蛩牀下鳴鴻雁雲端度  
良會豈無期歲月不肯駐俛仰何所言恍然傷

幽素

十二月九日雪用聚星堂韻

小樓香氣消銀葉日暮江村正飛雪穿林入隙  
自悠揚衣袖輕沾亦幽絕卷簾閒望不知寒得  
句欲書兔毫折黯靄山尖翠影沈模糊徑曲人  
蹤滅岸旁漁舍煙不起風際青帘凍難掣爽如  
秋氣滌襟懷光若朝暎眩眼纈試煮牀頭新漉  
酒鑪炭紅餘一寸屑憶得前年呵凍吟堪惜韶



華成一瞥此時歡樂比屋同來歲豐穰互相說  
夜深清響落風簷夢破重衾冷於鐵

遊橫雲山莊三首

一徑穿林入雙扉面水開有山都抱屋無砌不  
封苔雲氣縈衫袖嵐光落酒杯到來塵境隔何  
必問蓬萊

地僻松杉古寥寥人跡稀寒花含宿露紅葉舞  
斜暉山鳥閒催句溪風冷透衣笑言深樹底相

對憎忘歸

倚檻徘徊久遙巒起夕陰桂香傳道氣梵唄印  
禪心遠寺寒燈小虛窗皓月深一篙秋水闊何  
日更相尋

秋霽偶成次小姑韻

野塘波冷落紅蕖茅屋蕭然恰雨餘一桁山光  
圍几席半簾松翠溼圖書遣懷詩句乘閒寫愛  
月心情爲病除不負窗前秋意好素琴三弄樂

清虛

曉起

捲箔延輕涼  
槿花嬌欲吐  
一鳥忽驚飛  
蹴落花  
梢露

暮春

鳩婦催晴三月天  
東風無力雨廉纖  
翻書啜茗  
消長日滿院飛花不捲簾

第四冊

卷七

沈女史蕙玉字晚亭一字綠莊江蘇震澤縣人  
吳江舉人倪學涵室夫婦能詩時稱嘉耦著有  
聊一軒詩稿

聊一軒詩稿

震澤沈蕙玉晚亭

自箴四首

天生烝民有覺其性陰陽肇判含元達順琴瑟  
載詠蘋蘩攸司夙夜用敬猶慮或虧無日深聞  
莫子云覲淑慝在躬指視暗室惟椒與蘭植於  
中田我思君子淑慎塞淵

先民有言言不出閫牝雞之晨厥家用損佩以

聊一軒詩稿

丁三十五

應節琴以和神詞苟或費寧然而存勿尙爾舌  
寸心是弛旣悔而追不脛千里嗟嗟愚盲慎其  
德音鸚鵡多言祇名文禽

紆纊在笥煥乎有爛淒其以風滋我永歎維織  
與紆爲坊厥心舍業而嬉淫慝相尋野有絡緯  
振迅其翼爾安用媮微羽所疾雖有孔翠不如  
春蠶之子纂組不如布縑

冀妻如賓孟光舉案夫豈矯情媮情斯遠啼眉

折腰邦國之妖彼昏罔知反以用驕幽閒貞靜  
曰配君子載色載笑若佐之史敬而能和穆如  
清風修身準此維以令終

同聲歌

少小屬閨闈感君意纏綿聘以明月珠迎以黃  
金羈結褵自今夕誓好永百年采蘭涉秋水薦  
藻奉華筵合歡裁作被朱絲繰作絃雖無蘭蕙  
姿向日呈芳妍一身皆君有寸心私自憐何以

答嘉惠持以充豆籩在天莫爲雲雨落難上天  
在地莫爲影日暮愁棄捐婉孌保素志跬步稱  
比肩

贈小姑

美人坐遙夜虛窗橫素琴迢迢泛餘韻清露溥  
衣襟起看藤蘿月庭階垂綠陰

擬少陵七歌二首

有母有母山中居丹楓苦竹交門閭猩猩啼煙



山鬼嘯頻歲寄我艱難書我欲從之路梗塞罡  
風吹斷雲中車嗚呼三歌兮歌斷腸生女不如  
棄路旁

有妹有妹愁飄零年未三十長冥冥諸孤繞牀  
索梨栗總帳風颯燈熒熒白頭老母數歸日荒  
溪無復重揚舲嗚呼四歌兮歌倍悵西望苕溪  
波浪惡

遣興

小徑依蘭圃幽齋枕水涯留賓窺阮籍封札報  
秦嘉斜月臨衣桁名山出畫幙東隣諸女伴步  
屨屢看花

過虎邱追和堯峯韻

七里紅闌路依山儼翠屏畫裙飛蛺蝶釣艇集  
蜻蛉岸圻苔埋碣橋縈市傍汀微茫煙樹外想  
見可中亭

讀明紀殉難諸臣傳

勸進紛紛逐後塵  
倒持手版拜黃巾  
中原只數劉中翰  
信國當年有後身

雨窗夜坐

香燼熏篝小睡醒  
殘燈起坐暗銀屏  
不知誰唱吳娘曲  
寒雨蕭蕭徹夜聽

第四冊

卷八

張女史因字淨因一字淑華湖北江夏縣人江  
都舉人黃文暘室善畫工詞著有雙桐館詩鈔  
綠秋書屋詩集

綠秋書屋詩集

江夏張 因淑華

送秋平赴試

落葉滿階砌西風鳴紙窗曉起促行色相對兩  
茫茫雖無久離別中心自感傷何如百里婦屢  
屢炊高糧朝餐渾未備枵腹赴征航細雨淫行  
袂涼飈吹短裝饑鴻唳天表寒鷺下林塘行李  
太單薄何以禦嚴霜執手斯須立有淚已盈眶

大夫富經術憂患天所嘗行矣勿復顧努力事  
明揚秃筆吐異彩古墨發新香不挾兔園冊惟  
憑胸所藏幸逢冰作鑑慎勿輕文章

答王愛蘭夫人

武陵客二載遊遍羣峰青况復得吟侶相賞挹  
芳馨耳君盛名久結念託冥冥一卷冰雪詩字  
字本性靈兄妹兩酬唱天倫樂家庭彼此勉闢  
德足以垂儀型緬想村居景柳綠濃遠汀

題河鯉登龍門圖

僭騰斗室搖長風  
壁間錦鱗思成龍  
揚鬚鼓鬣河當中  
頭角未具鱗甲雄  
龍門萬仞摩蒼穹  
縱生八翼層雲封  
欲跳不跳喧豐隆  
我見爲之心忡忡  
鱗兮鱗兮開鴻濛  
超然一躍如飛虹  
雷火燒尾五雲從  
萬里青霄路忽通

湖上

湖上春光麗  
風薰日正和  
蜨隨芳草集  
柳近畫

樓多鶯囀疑絲竹花香散綺羅誰能攄彩筆寫  
出好煙波

答王子一子莊兩女史

詩人聚一室吟絮獨推君翹首望明月相思阻  
白雲有才能異俗妙思總超羣顧我傷遲暮江  
洲日易曛

衰柳

搖落無心問化工秋山秋水怨何窮黃眉慘淡



愁逢雨青眼颼零泣向風賸有寒蟬鳴古岸更  
無殘月照離宮斷魂莫趁羌人管又逐清商入  
遠空

四十初度和秋平

荷君雅意比良朋鮑叔梁春愧未曾每笑敲詩  
成勁敵有時并坐似枯僧春湖煮茗花爲供永  
夜圍棋月作燈安得神仙遺上藥瓊霄攜手學  
飛昇

夏夜

涼風送遠鐘露溼桐陰薄斜月影沈西臥見榆  
花落

丙午清明

十里紅樓醉管絃揚州春色最堪憐逢人怕說  
晨炊斷只道連朝是禁煙

題阮梅叔珠湖漁隱圖

北湖清淺水連天記是吾家老屋邊涼月一蓬

煙一笛蘆花深處釣魚船

第四冊

卷九

汪女史韞玉字潛輝一字蘭雪安徽休寧縣人  
歸安諸生金朝室幼穎慧學詩兩月卽能成章  
著言要司卷通直

聽月樓遺草

休寧汪韞玉蘭雪

過凝香閣看菊

百卉向秋凋爾獨經霜媚造物本無私特爲高  
人置當軒闢小徑冷豔襲煙翠瘦立淡無言臨  
風想高寄主人愛客來煮茗助幽致香氣日夕  
佳徘徊得真意彭澤已去久風流此可繼何庸  
酌甘泉餐英已先醉

聽月樓遺草

丁巳十五

采蓮曲

霞光欲斂湖光綠紅藕風微散芳馥木蘭舟裏  
石榴裙擢歌聲出橫塘曲就中有女殊娟娟陸  
離羽珮珍珠鈿欲采不采嬌無力停橈暗羨鴛  
鴦眠鴛鴦比翼空凝佇翠袖臨波淡容與淚珠  
不共露珠晞儂心似較蓮心苦苦心脈脈有誰  
知滿湖涼月空相思彩雲天遠何由到妾貌如  
花能幾時

題攜琴看鶴圖

君不見雕鞍駿馬五陵游，臂鷹挾彈懸吳鉤。  
又不見十千沽酒蘭陵市，玉管金壘鬪華侈。  
人生行樂須及時，免俗未能聊復爾。名士心期獨不  
然，逍遙物外得林泉。栗里之琴何寂寂，西山之  
鶴何翩翩。琴鶴優游少塵霧，修竹幾竿松幾樹。  
浮生夢覺卽神仙，披圖髣髴丹邱路。

月上

月上碧天淨微雲淡不收超超千象外皎皎一  
輪秋照地雪疑積臨波金欲流良宵意不盡千  
里共悠悠

聞蛩

秋閨憐夜永悽惻聽鳴蛩最苦當窗月還驚落  
葉風暗愁吟不定絮語訴難終無限關山意應  
知此際同

秋夜書懷



庭院蕭疎冷桂林懷人江上又秋深滿階風雨  
三更夢一水蒹葭千里心臥病那堪蟲唧唧無  
眠偏覺漏沈沈攬衣中夜情何限不把離愁訴  
玉琴

柳絮

楊柳春情孰主張輕風吹落絮飄颻漫空欲混  
白雲影到地卻沾紅雨香漠漠溪流悲浪逐茫  
茫鴻爪恨天長一生只有詩材好付與東山窈

寵娘

送外之蘭陵

綠遍郊原草正肥  
垂楊千縷思依依  
已憐客去春兼去  
那更帆飛花又飛  
玉笛尋常吹落月  
疎林容易下斜暉  
勸君別後休吟苦  
白雪天涯和者稀

春晝

春晝陰陰繡嬾拈  
鷓鴣聲裏雨廉纖  
多愁怕見

東風面一任花飛不捲簾

秋日寄外二首

送君時節綠陰肥轉瞬山城木葉稀怪底高樓  
鴻雁過故書人字向南飛

紗窗如雪月華明刀翦方閒已二更纔欲天涯  
尋舊夢鄰家又送搗衣聲

第四冊

卷十

高夫人景芳字遠芬漢軍正紅旗人浙閩總督  
琦女世襲一等靖逆侯張宗仁室工篆隸嫺詞  
賦尤善駢體文著有紅雪軒稿六卷

紅雪軒詩橐

漢軍高景芳遠芬

白雲四章 小序

白雲思親也親在則望親沒則思吁嗟  
梁公先得我心

英英在天白雲孤飛欲瞻我父泣血霑衣瀾瀾  
盱江道遠莫歸維親之故使我心悲銜痛終天  
事與願違念往隨雲毛羽式微靜言思之幽明

會稀

白雲翩翩自北徂南念我慈母泣止江干畫舫  
將迎有子承歡未及三載遘疾弗痊旣失嘗藥  
又未撫棺骨肉死別摧心剝肝中夜自思腸枯  
淚乾

親存弗養親沒徒思如彼白雲自天覆之油然  
布雨長荷恩施大德未報寸草徒滋願言永依  
狂飈相吹晴空悵望欲報無期

誰謂無能予亦有子誰謂有待親已逝只卷舒  
無蹟未知所止幽顯相懸屬毛離裏睠然四顧  
潸然隕涕吟咏白雲傷心無已

詠月

明明中天月聞從海上生與日相繼代隨時自  
虧盈惟此一片光照見萬古情我欲往問之迢  
迢隔太清安得不死藥飄然遊玉京

號寒蟲

華山有一鳥春時毛羽豐得意躍且鳴聲聞高  
樹中鳳凰不如我得無自尊崇忽然歲將暮日  
慘天多風其毛反脫落蜩縮難飛狎失志音亦  
變哀哀訴其窮曰得過且過局踳深草叢吾觀  
富家兒傲慢凌王公裘馬何赫奕出入氣豪雄  
黃金一朝盡冠服皆不充徒步訪親朋聞人不  
爲通世事寧有定請視寒號蟲

上留田



上留田內有荒冢埋寒烟上不見蒼天下不及  
黃泉中藏髑髏何髡然死者雖無知生者正有  
權胡爲手足忍棄捐盍思未出母腹前一氣亭  
毒分後先骨肉委之竟不顧掩土反動旁人憐  
我聞宋氏有五女相約不嫁侍父終天年生長  
聚首歿齊葬玉經水火彌貞堅唐宗召入爲學  
士煌煌青史名並傳男兒薄倖不如女一門兄  
弟往往操戈鋌吁嗟乎若憲姊妹誠足賢君不

見上留田

輪租行

驢駝口袋牛挽車天陰防雨宜重遮農人惜米  
如珠寶官府視米如泥沙不辭淋尖與加耗早  
賜收取客歸家願存升斗買麤布聊與妻兒補  
破袴盡情傾倒實堪憐羞澀反遭倉吏怒驅牛  
出城口吻乾無錢沽酒當風寒辛苦回來夜將  
半細嚼筐中草頭飯

河魴魚

荻芽簇簇未出土海口鰈鰈腹如鼓紅脣鮐背  
味則腴子脹肝麻毒如蠱吳兒此際嘗新鮮刀  
批水洗防未然釜中最怕塵埃污鐺裏預將青  
果煎東鄰有子年二十昨晚賓朋同譙集拌命  
誰知命竟拌曉來聽得家人泣山珍海錯異味  
多何須几席生干戈無端口腹喪身命請君三  
復河魴歌

憶諸弟

蜚鳴望雲路辛苦耐窮居干祿三年學貽謀數  
卷書夢多憐道遠病久怪音疎姊弟天親厚縈  
懷十載餘

喜乳母至

保抱予方幼恩勤爾最賢衰羸憐此日辛苦話  
當年適口供兼味安身葺數椽名居八母一惠  
養亦宜先